

Արեւմտեան Եւրոպայում ազատորդի- ներին համապատասխանում են զինակիր- ները, որոնք 14-15 տարեկանից հմտանում էին ռազմական գործի մէջ: Մի քանի տա- րի ծառայելուց յետոյ, եթէ տուեալ զինա- կիրը աչքի էր ընկնում քաջութեամբ, նա իր սենեօրից խնդրում էր ասպետի կոչում շնորհել իրեն³⁸:

Այսպիսով, Բագրատունեաց թագաւո- րութեան հռչակումից յետոյ ազատների դասը Հայաստանում Թ-ԺԱ դարերում

ձեռք էր բերել որակական նոր յատկանիշ- ներ, յստակ կանոնակարգուել էին ազատ- ների պարտականութիւններն ու իրա- ւունքները: Ունենալով գործունէութեան կանոնակարգուած, համընդհանուր ընդու- նելութիւն գտած սկզբունքներ, հանդիսա- նալով բարձրաստիճան զինուորականներ՝ ազատները, յատկապէս՝ նրա վերին շերտը, առանձնանում էին զինուորականութեան ներսում եւ հասարակութեան մէջ՝ որպէս ինքնամփոփ, փակ հասարակական դաս:

38 Д. Т. Денисон, История конницы, militera. lib.ru/h/denison/index.html. Ж. Ж. Руа, История рыцарства, М., 2004, ст. 49.

ՍՄԲԱՏ ՄԱԳԻՍՏՐՈՍ

Կարէն Սաթեղեան

Անիի Բագրատունեաց թագաւորու- թեան Ժ դարի վերջերի եւ ԺԱ դարի սկզբների զինուորական գործիչ եւ եկեղե- ցաշինարար Սմբատ Մագիստրոսի վերա- բերեալ երկու փաստ է յայտնի: Առաջինն այն է, որ նա 998 թ. Մմբոյ գիւղի մօտ տե- ղի ունեցած ճակատամարտում մահմեդա- կանների դէմ դուրս եկած քրիստոնէական միացեալ բանակի կազմում երկու այլ զօ- րավարների՝ Վահրամ Պահլաւունու եւ Ա- շոտ մարզպանի հետ գլխաւորել է Անիի թագաւորութեան 6000-անոց զօրամասը, եւ երկրորդը, որ 1010 թ. կառուցել է Անիի մերձակայ Բագնայրի վանքը:

Ո՞ր տոհմից էր սերում Սմբատ Մա- գիստրոսը: Յայտն եղած պատմագրական ողջ գրականութեան մէջ նա համարուում է սպարապետ Վահրամ Պահլաւունու որդին: Սակայն սկզբնաղբերների քննութիւնն այլ եզրակացութեան է յանգեցնում. պարզուում է, որ Վահրամ Պահլաւունին Սմբատ անունով որդի չի ունեցել եւ Սմբատ Մագիստրոսը միանգամայն այլ իշխանական տան ներկայացուցիչ է: Ծա- նօթանանք փաստերին:

1004 թուականին իր Տիեզերական պատմութիւնը աւարտած Ստեփանոս Տարօ- նեցի Ասողիկը գրում է այն մասին, որ Մամլան ամիրան հսկայական բանակով յարձակուել է Դաւիթ կուրապաղատի իշ- խանութեան վրայ, իսկ վերջինս գիմել է Հայոց եւ Վրաց թագաւորներին՝ օգնու- թեան խնդրանքով: Գագիկ Ա Բագրատու- նին (990-1020)¹ յատկացրել է վեց հազար

զինուոր, որոնց գլխաւորում էին երեք զօ- րավարներ: Այս հատուածը Ասողիկի Պատ- մութեան հրատարակութիւնից մէջբերելուց առաջ նշենք, որ այստեղ հետագայում ընդմիջարկութիւն է կատարուել, որը մա- սամբ փոխել է դրա բովանդակութիւնը:

Հրատարակութեան մէջ կարդում ենք. «Եւ Գագիկայ յամենայն զօրացն Հայոց հատեալ զգունդ ԶՌ (6000) զընտիր ընտիր վառելոցն՝ գումարէ ի ձեռն իշխանաց իշ- խանին Վահրամայ, որդւոյ Գրիգորոյ Պահլաւունւոյ, որ զՄարմաշէն եւ զԲրգ- ներն շինեաց, եւ Սմբատայ մաժիստրոսի, որդւոյ Վահրամայ, եւ մարզպանին Աշո- տոյ»²: Տողատակում հրատարակիչը նշում է, որ օգտագործուած օրինակներից մէկում եղել է այլ տարբերակ. «... իշխանաց իշ- խանին Վահրամայ որդւոյ Գրիգորոյ. եւ Սմբատայ մաժիստրոսի որդւոյ Վահրա- մայ. եւ մարզպանին Աշոտոյ Պահլաւուն- ւոյ, որ զՄարմաշէն շինեաց. որ զԲրգներն շինեաց»³:

Այստեղ ընդմիջարկութեան գոյու- թեան մասին կուսհել է Հ. Ներսէս Ակի- նեանը: Նա գրում է. «Ինձի կը թուի թէ Ա- սողիկի բնագիրը ունեցած է լուսանցագ- րութիւններ, որոնք սխալմամբ բնագրին մէջ առնուած են. կ'առաջարկեմ կարդալ. «... որդւոյ Գրիգորոյ Պահլաւունւոյ, որ զՄարմաշէն շինեաց, եւ Սմբատայ մա- ժիստրոսի որդւոյ Վահրամայ, որ զԲրգ- ներն շինեաց, եւ մարզպանին Աշոտոյ»⁴:

1 Ըստ Կ. Իզրազեանի՝ Գագիկ Ա-ը մահացել է 1017 թ. (К. Юзбашян, Армянские государства эпохи Багратидов и Византия IX-XI вв., М., 1988, ст. 156):

2 Ստեփանոսի Տարօնեցոյ Պատմութիւն տիեզե- րական, աշխ. Ստ. Մալխասեանցի, Սանկտ-Պե- տերբուրգ, 1885, էջ 270
3 Նոյն տեղում
4 Ն. Ակինեան, Ներսէս Լամբրոնացի, Վիեննա, 1956, էջ 358

Մատենադարանում պահուող Ասողիկի Պատմութեան Հնագոյն ձեռագիրը (ՄՄ ձեռ. թիւ 2865)⁵, որը ԺԳ դարից է, վերջնականապէս պարզում է հարցը: Այնտեղ հեղինակային բնագրի հարեւանութեամբ իրօք տեսնում ենք հետագայի մի լուսանցագիր յաւելում Մարմաշէնի եւ Բագնայրի մասին, որը յաջորդ գրիչները ներմուծել են բնագրի մէջ եւ շփոթի առիթ ստեղծել: Ահաւասիկ իրականում ինչ է գրել Ասողիկը. «Եւ Գագկայ յամենայն զաւրացն Հայոց հատեալ զգունդ վեցհազար զընտիր ընտիր վառելոցն, գումարէ ի ձեռն իշխանաց իշխանին Վահրամայ որդւոյ Գրիգորոյ, եւ Սմբատայ մաթիստոսի որդւոյ Վահրամայ, եւ մարզպանին Աշոտոյ»⁶: Այս հատկապէս աջ, լուսանցքում, Վահրամի անուն հաւասարութեամբ սկսում է եօթ կարճ տողերից բաղկացած մանրատառ յաւելումը. «Պաշտօնոյ որ զՄարմաշէն շինեց: Որ զԲզներն շինեց»⁷ (տե՛ս լուսանկարը): Այս լուսանցագիր յաւելում կատարողը ցանկացել է աւելացնել իրեն յայտնի փաստերն այն մասին, որ Վահրամ Պաշտօնին Մարմաշէնն է կառուցել, իսկ Սմբատ Մագիստրոսը՝ Բագնայրը, այդ պատճառով երկու տուեալն առանձնացրել է վերջակէտով: Բայց հետագայի ընդօրինակողներն այդ տողերը, որպէս միասնական միտք, ներմուծել են բնագրի մէջ՝ մի դէպքում Վահրամի հօր անունից յետոյ (ինչպէս Ասողիկի հրատարակութեան մէջ է), միւս դէպքում՝ Աշոտ մարզպանի անունից յետոյ (ինչպէս հրատարակութեան տողատակում նշուած օրինակում):

5 Այս ձեռագրի շնորհիւ Ասողիկի բնագրում ճշտումներ է կատարել Գ. Գրիգորեանը (Գ. Գրիգորեան, *Տարածի Բագրատունիների ֆեոդալական իշխանութիւնը Թ-Ժ դարերում*, Եր., 1983, էջ 147):
 6 ՄՄ ձեռ. թիւ 2865, թերթ 236ա: Այս եւ յաջորդ մէջբերումներում կատարուած ընդգծումները մերն են - Կ. Մ.:
 7 *Նոյն տեղում*

Շատ կարեւոր հանգամանք է այստեղ նաեւ այն, որ Ասողիկի բնագրում, փաստօրէն, չի օգտագործուած Պահլաւունի տոհմանունը: Այն նշուած է հետագայի յաւելման մէջ: Գրիգոր Մագիստրոս Պահլաւունուն նուիրուած մենագրութեան մէջ Լ. Խաչերեանը, հանգամանօրէն քննելով Պահլաւունիների մասին վաղ յիշատակութիւնները եւ նրանց իսկ թողած բոլոր արձանագրութիւնները, յանգում է այն եզրակացութեան, որ նրանք բաւական ուշ են որդեգրել այդ տոհմանունը: Հեղինակի համար առեղծուած է մնում, թէ ինչպէս է, որ 1004 թ. իր Պատմութիւնում աւարտած Ասողիկը նշել է Պահլաւունի տոհմանունը, եւ սկիզբից դա համարում է այդ անուն ամենավաղ յիշատակութիւնը⁸: Ինչպէս տեսնում ենք, Ասողիկի Պատմութեան Հնագոյն ձեռագիրը պարզութիւն է մտցնում նաեւ Պահլաւունեաց տոհմաբանութեանն առնչուող այս էական հարցում:

Հիմա տեսնենք, թէ կարո՞ղ էր արդեօք Սմբատ Մագիստրոսը Վահրամ Պահլաւունու որդին լինել: Ասողիկը նշում է, որ Հայոց բանակը ղեկավարել են երեք հոգի՝

Գրիգորի որդի՝ իշխանաց իշխան Վահրամը.

Վահրամի որդի՝ Սմբատ Մագիստրոսը.

Աշոտ մարզպանը:

Եթէ Սմբատը Վահրամ Պահլաւունու որդին լինէր⁹, պատմիչը նրա անունը չէր

8 Լ. Խաչերեան, *Գրիգոր Պահլաւունի Մագիստրոս*, Լոս Անճելոս, 1987, էջ 30
 9 Վ. Վարդանեանը, լիովին համոզուած լինելով, որ Սմբատ Մագիստրոսը Վահրամ Պահլաւունու որդին է, Ասողիկի Պատմութեան այդ հատուածից ընդհանրապէս հանել է երկրորդ անգամ ճշտած Վահրամ անունը եւ հատուածը թարգմանել հետեւեալ կերպ. «Գագիկը Հայոց զօրքից առանձնացնում է (զո) վեց հազար ամենաընտիր եւ զինավառ մի գունդ, յանձնում Մարմաշէնն ու Բրզները կառուցող Գրիգոր

կրկնի, այլ կը նշէր իշխանաց իշխան Վահրամը եւ նրա որդին՝ Սմբատ Մագիստրոսը: Բայց պատմիչը լաւ էր ճանաչում իր ժամանակակիցներին: Ծմբոյի ճակատամարտի մանրամասները նկարագրելով նա նշում է. քանի որ Հայոց եւ Վրաց զօրաբանակները թագաւորներ չէին գլխաւորում, ամէն տոհմ մարտի էր նետուած ինքնուրոյն. «Իսկ զօրն Հայոց եւ Վրաց, զի ոչ թագաւոր զոք ունէին... իւրաքանչիւրքն ըստ տոհմից եւ աւագութեան գնդից դիմէին, առիւծաբար մռնչելով՝ յանտառացեալ բազմութիւն բանակին Պարսից»¹⁰: Սա եւս ցոյց է տալիս, որ ճակատամարտի զօրահրամանատարներին թուարկելիս պատմիչը տարբերակել է նրանց ըստ տոհմերի:

Վիմագիր եւ մատենագրական աղբիւրներում յիշատակուած են Վահրամ Պահլաւունու երկու որդիները՝ Գրիգորը եւ Ապուղամը: Գրիգորը, հաւանաբար աւագն էր, քանի որ պապի անունն էր կրում: Յայտնի է, որ նա ծանր հիւանդութիւն ունէր: Ապուղամը 1031 թ. Անիի Առաքելոց եկեղեցուն նուիրատուութիւն է կատարել եղբոր առողջութեան եւ երկարակեցութեան համար («վասն եղբաւր իմ Գրիգորոյ առողջութեան եւ կենաց յերկարութեան»)՝¹¹: Բայց Ապուղամը Գրիգորից աւելի վաղ է մահացել՝ դատելով Վահրամ Պահլաւունու՝ 1031-1033 թթ. ժամանակա-

Պահլաւունու որդի իշխանաց իշխան Վահրամի եւ նրա որդի Սմբատ մագիստրոսի ձեռքը, ապա նաեւ Աշոտ մարզպանի...» (Ստեփանոս Ասողիկ Տարօնցի, *Տիեզերական պատմութիւն*, թարգմանութիւնը, առաջաբանը եւ ծանօթագրութիւնները Վ. Վարդանեանի, Եր., 2000, էջ 331): Աւելացուել են բնագրում չեղած *նրա որդի* բառերը, միեւնոյն ժամանակ ստացում է, որ Մարմաշէնն ու Բագնայրը Վահրամի հայր Գրիգորն է կառուցել:
 10 Ստեփանոսի Տարօնցոյ *Պատմութիւն*, էջ 272-273
 11 *Դիւան հայ վիմագրութեան*, պր. Ա. կազմեց Թ. Օրբելի, Եր., 1966, էջ 12:

միջոցին գրած մի արձանագրութիւնից¹²: Հ. Ն. Ակիբեանը, Սմբատին անդրադառնալով, գրում է. «Վահրամ, որ յիշած է իր արձանագրութիւններու մէջ իր եղբայրներու եւ զաւակներու անունները, խօսք չէ ըրած ամենեւին Սմբատիս մասին»¹³: Սակայն աւանդոյթի ուժն այնքան մեծ է եղել, որ այս կարեւոր դիտարկումն անելով հանդերձ՝ նա Սմբատին համարել է Վահրամ Պահլաւունու որդի:

Ուսումնասիրողները, ցաւօք, աչքաթող են արել եւս մի կարեւոր հանգամանք: Յայտնի է, որ Վահրամ Պահլաւունին եւ իր որդի Գրիգորը զոհուեցին՝ մասնակցելով 1045 թ. բիւզանդացիների Դուլինի ամիրայի դէմ կատարած արշաւանքի ժամանակ: Վահրամն այդ պահին տարիքն առած մարդ էր (նրա տարիքի մասին ուղղակի վկայութիւններ չեն պահպանուել): Յայտնի է, որ Բագրատունեաց պետութեան խոր ճգնաժամի տարիներին՝ 1041-1045 թթ., նա Անիում ամենագործուն քաղաքական դերակատարներից մէկն էր: Բայց եթէ անգամ ենթադրենք, թէ իր մահուան ժամանակ նա ութսուն տարեկան էր, ինչպէս Կ. Կոստանեանցն է գրում. «1047-ին պատերազմի մէջ մեռաւ... ութսունամեայ ծերունին Վահրամ»¹⁴, 1045-ից 80 տարի հետ գնալով՝ կը գտնենք նրա ծննդեան թուականը՝ 965, եւ պարզ կը լինի, որ Ծմբոյի ճակատամարտի ժամանակ՝ 998 թուականին, նա 33 տարեկան էր: Մօտաւոր ելակէտ ունեցող այս հաշուարկի մէջ մէկ-երկու տարուայ տեղաշարժը, ա-

12 *Նոյն տեղում*, էջ 32. Վ. Վարդանեան, *Պահլաւունիները Հայոց պետականութեան եւ հոգեւոր անաղարտութեան պահպանումներ*, Եր., 2008, էջ 54
 13 Ն. Ակիբեան, *Աշխ.*, էջ 358: Նկատենք, որ Սմբատ անունն ընդհանրապէս չի հանդիպում Պահլաւունիների տոհմում:
 14 *Գրիգոր Մագիստրոսի թղթերը*, բնագիրն յառաջաբանով եւ ծանօթագրութիւններով Կ. Կոստանեանցի, Ալեքսանդրապոլ, 1910, էջ 292

ուջ կամ յետ, չի կարող էական նշանակութիւն ունենալ: Իրողութիւնն այն է, որ Մմբոյի ճակատամարտի ժամանակ Վահրամ իշխանաց իշխանն այնքան երիտասարդ էր, որ չէր կարող զօրավարութեան տարիքի, առաւել եւս՝ մագիստրոսի պատուատիճանի հասած որդի ունենալ:

Վահրամ Պահլաւունու կենսագրութեան մէջ նրա կարծեցեալ Սմբատ որդու մասին էջը պէտք է փակուած համարել եւ փորձել իրական տեղեկութիւններ գտնել Սմբատ Մագիստրոսի մասին: Մեր համոզմամբ, վերջինս նուազագոյնը Վահրամ Պահլաւունու սերնդակիցն էր, իսկ աւելի հաւանական է, որ աւելի տարեց մարդ էր՝ դատելով Մմբոյի ճակատամարտի ժամանակ նրա մագիստրոս լինելու հանգամանքից:

Ընդհանրապէս առանձին քննութեան նիւթ է այն, թէ ինչպէս ժ դարի վերջերին եւ ժԱ դարի սկզբներին Հայաստանում այդքան շատացան բիւզանդական տարբեր տիտղոսներ ու պատուատիճաններ կրողները, այդ թւում՝ մագիստրոսութեան պատիւ ստացողները¹⁵: Արդականի 1001 թ. մի արձանագրութեան մէջ մագիստրոս պատուատիճանով է յիշուում Հասանի որդի Գրիգոր (Ապիրատ) իշխանը, որը մի քանի տարի անց կառուցեց Կեչառիսի վանքը, իսկ չինարարական արձանագրութեան մէջ իրեն անուանում է Գրիգոր Մագիստրոս¹⁶: Ասողիկի վկայութեամբ, 1001 թուականին

Հայաստանի սահմանները հասած բիւզանդական Բարսեղ (Վասիլ) Բ կայսրը մագիստրոսութեան պատիւ է շնորհել հայ եւ վրացի մի քանի իշխանաւորներին¹⁷: Սմբատը, ինչպէս տեսանք, մագիստրոսի պատուատիճանով է յիշատակուում արդէն 998 թուականին:

Այժմ անդրադառնանք Սմբատ Մագիստրոսի մասին երկրորդ հիմնական տուեալին, որը հաղորդուում է Սամուէլ Անեցին: Ժամանակագրական աղիւսակի Հայոց ՆԾԹ (1010) թուականի դիմաց նա գրում է. «Սմբատ Մագիստրոսն շինեաց զհրեշտակաբնակ եւ զփափագատենչ վանքն՝ որ Բագնայր յորջորջիւր՝ ժողովեալ աստուածայնոց արանց»¹⁸: Հարկ է նշել, որ Սամուէլ Անեցու ժամանակագրութեան 1893 թ. վաղարշապատեան հրատարակութեան մէջ իրադարձութիւնների մեծ մասի վերաբերեալ նշուած է միայն Փրկչական թուականը, որն այդ երկուսն էրկու տարով առաջ է այժմ գործող թուականից¹⁹: Ըստ այդմ՝ յիշեալ հրատարակութիւնից օգտուողները Բագնայրի վանքի կառուցումը նշում են 1012 թուականին, մինչդեռ ճիշտ է Հայոց թուականը, որը տուեալ դէպքում ՆԾԹ (1010) թուականն է: Այդպէս են իրողութիւնն ընդունել նաեւ միջնադարեան հեղինակները: Սամուէլ Անեցուց օգտուելով Սմբատ Մագիստրոսի ձեռամբ Բագնայրի վանքի կառուցման մասին յայտնում են Յովհաննէս Սարկաւազի ժամա-

15 Մագիստրոսը թիւզանդական արքունիքի կողմից օտարերկրացիներին տրուող ամենաբարձր պատուատիճանն էր, որը ենթադրում էր նաեւ ամենամեայ շօշափելի դրամական վարձատրութիւն (Հր. Բարթիկեան, Հայ-թիւզանդական հետազոտութիւններ, Եր., 2002, էջ 669):

16 Գ. Սարգսեան, Գրիգոր-Ապիրատ Հասանեան. հիմնադիր Կեչառիսի վանքի (վիճագրական նոր վկայութիւն), «Հին Հայաստանի մշակոյթը», 12, Եր., 2002, էջ 111. Կ. Մաթեոսեան, Հազարամեայ Կեչառիսի հիմնադրման պատմութիւնից, «Էջմիածին», 2004, Ա, էջ 77-91

17 Ստեփանոսի Տարօնեցոյ Պատմութիւն, էջ 276-278

18 Սամուէլի քահանայի Անեցոյ Հայաքմունք ի գրոց պատմագրաց՝ յաղագս գիտի ժամանակաց անցելոց մինչեւ ի ներկայս ծայրաքաղ աւարեալ, յառաջաբանով եւ ծանօթութիւններով Արշակ Տէր-Միքէլեանի, Վաղարշապատ - Ս. Էջմիածին, 1893, էջ 105:

19 Լ. Խաչիկեան, Վ. Յակոբեան, Ինչպէս չպէտք է հրատարակուեն պատմական սկզբնաղբիւրները, - ՀՍՍՌ ԳԱ հասարակական բաժանմունքի տեղեկագիր, 1949, թիւ 2, էջ 82

նակագրութեան շարունակողը²⁰, պատմիչներ Կիրակոս Գանձակեցին²¹ եւ Մխիթար Այրիվանեցին²²:

Բագնայրի վանքը Անիի հետ սերտորէն կապուած խոշոր հոգեւոր մշակութային կենտրոն էր, որը ժԱ-ԺԳ դարերում ծաղկում ապրեց²³: Հնագոյն եկեղեցին Ս. Աստուածածինն է, որն էլ պէտք է Սմբատ Մագիստրոսի ձեռակերտը լինի: Հետագայում այստեղ առաջացել է վանական խոշոր համալիր:

Արդեօ՞ք Բագնայրի վանքը տեղեկութիւններ պահպանել է Սմբատ Մագիստրոսի տոհմակիցների վերաբերեալ: Ցաւօք, վանքի ամենահին թուակիր արձանագրութիւնը ՆՂԱՅ (1042) թուականից է: Սակայն պահպանուել է մի անթուական արձանագրութիւն, որն աւելի վաղ է գրուած: Այստեղ իշխան Վասակ Պահլաւունու դուստր (Գրիգոր Մագիստրոս Պահլաւունու քոյր) Սեդան յայտնում է վանքին կատարած նուիրատուութեան մասին, որն արել է ի յիշատակ իր հօր՝ Գրիգորի զօրական Վասակի: Յայտնի է, որ մահմեդական հրոսակների դէմ կռուի ելած Վասակը սպանուել է 1021 թ., հետեւաբար Սեդայի արձանագրութիւնը գրուել է այդ կամ յաջորդ թուականին, հօր կորստեան անմիջական տպաւորութեան տակ:

Իսկ հիմա տեսնենք, թէ Բագնայրում ինչ կարգավիճակով է հանդէս գալիս Վասակ Պահլաւունու դուստրը: Նա գրում է. «Եւ Սեդա տիկնաց տիկին... զուգակից

Վահրամայ իշխանաց իշխանի, որդւոյ Աշոտոյ իշխանաց իշխանի...»²⁴: Այսինքն՝ նա հարս էր եկել մի իշխանական տուն, որի աւագ ներկայացուցիչը Աշոտ իշխանաց իշխանն էր, իսկ կրտսերը՝ իր ամուսին Վահրամը: Նկատենք, որ այս արձանագրութիւնը գրուել է վանքի հիմնադրումից ընդամէնը մէկ տասնամեակ անց, եւ կարելի է ենթադրել, որ նրա մէջ յիշուած անձինք Սմբատ Մագիստրոսի տոհմակիցներն են: Մասնաւորապէս՝ չի բացառուում, որ Վահրամ իշխանաց իշխանը, Աշոտ իշխանաց իշխանի աւագ որդին լինելով²⁵, ստացել է իր Վահրամ պապի անունը, որը կարող է նոյնանալ Սմբատ Մագիստրոսի հօր հետ: Այլ կերպ ասած՝ հնարաւոր է, որ Բագնայրի հիմնադիր Վահրամի որդի Սմբատ Մագիստրոսը եւ Աշոտ իշխանաց իշխանը եղբայրներ էին: Այդ դէպքում միանգամայն հասկանալի կը դառնայ, թէ ինչու է այս տան հարսը՝ Վասակ Պահլաւունու դուստրը, նուիրատուութիւն արել Բագնայրին: Յիշենք, որ այս շրջանում այլ իշխանական տներ նոյնպէս վանքեր ու եկեղեցիներ էին հիմնում (Պահլաւունիների եկեղեցիները Անիում, Վահրամ Պահլաւունու հիմնած Մարմաշէնի վանքը, Գրիգոր Ապիրատ Մագիստրոսի հիմնած Կեչառիսի վանքը, նրա եղբոր՝ Գէորգի հովանաւորած Հաւուց թառի վանքը եւ

24 Ղ. Ալիշան, Օրիակ, Վեմետիկ-Ս. Ղազար, 1881, էջ 113

25 Վահրամի աւագութեան օգտին է խօսում այն, որ նրան կնութեան է տրուել ժամանակի ամենաընթացաւոր իշխաններից մէկի դուստրը, որն իր մասին հպարտութեամբ գրում է՝ «...դուստր Մեծին Վասակայ» (Ղ. Ալիշան, նոյն տեղում): Սեդայից բացի, Վասակ Պահլաւունու այլ դուստր աղբիւրներում չի յիշատակուում: Խնամարտ աղբիւրներում միջոցով այլ իշխանական տոհմերին համայնաբերու փորձատրութիւն ունեցաւ նաեւ Վասակի աւագ որդին՝ Գրիգոր Մագիստրոս Պահլաւունին, որի երեք դուստրերը նշանաւոր իշխանական ընտանիքները կազմեցին (Ն. Ակիմեան, Ձ. աշխ., էջ 372-373):

այլն) եւ հետամուտ էին դրանց բարգաւաճմանը: Մի բան պարզ է, որ վանքի կառուցումից (1010 թ.) մինչեւ Վահրամ իշխանաց իշխանի կնոջ արձանագրութեան ժամանակը (1021-1022 թթ.) այնքան կարճ միջոց է, որ դժուար թէ Սմբատ Մագիստրոսի տոհմի հետ կապ չունեցող մէկ այլ տոհմ այդքան տիրաբար (հանդիսաւոր արձանագրութեամբ) ներկայանար Բագնայրում:

Հնարաւոր է, որ այս ընտանիքի մի շառաւիղի մասին է վկայուած Մատենադարանի թիւ 275 Աւետարանի 1077 թ. յիշատակարանում, համաձայն որի՝ այդ ձեռագիրը գրել է տուել Վահրամի որդի Սմբատ պատրիկը²⁶: Գ. Յովսէփեանն, անտեսելով ժամանակի տարբերութիւնը, Սմբատ պատրիկին նոյնացնում է Բագնայրը կառուցող Սմբատ Մագիստրոսի հետ²⁷: Սակայն, մեր կարծիքով, Սմբատ պատրիկը զաւակն է վերը նշուած իշխանաց իշխան Վահրամի եւ Սեդայի: Յիշատակարանի սկզբում Սմբատը յիշում է իր պատրոնին, որը Կարսի վերջին թագաւոր Գագիկի դուստր Մարիամն էր, իսկ վերջում գրիչն աւելացնում է. «...զՍմբատ որդի Վահրամայ՝ քրիստոսասէր եւ բարեյաղթող պատրիկին յիշեսլիք ի Տէր եւ զծնաւղս իւր եւ եղբարս՝ զննջեցեալսն ի Քրիստոս»²⁸: Այստեղից երեւում է, որ այդ ժամանակ Սմբատ պատրիկը բաւական առաջացած տարիքում էր, երբ կորցրել էր ծնողներին ու եղբայրներին: Հնարաւոր է, որ նրա Սմբատ անունը ծագում է իր մեծանուն նախորդի՝ Սմբատ Մագիստրոսի անունից:

Հասկանալի է, որ լիակատար վստահութիւն չենք կարող ունենալ, թէ մեր բոլոր ենթադրութիւնները ճիշտ են: Սակայն առկայ նիւթերը թոյլ են տալիս Սմբատ Մագիստրոսի տոհմածառը կազմելու առաջին փորձը կատարել:

Ամփոփելով նկատենք, որ Բագնատունեաց Հայաստանի իշխանական տների մասին ցայժմ եղած պատկերացումները մեծ մասամբ գտնուում են աւանդական պատմագրութեան ազդեցութեան տակ, ուր զգալիորէն ուռճացուած է Պահլաւունեաց տոհմի դերը: Կասկածից վեր է, որ այդ տոհմը բացառիկ դիրք ունէր Անիի թագաւորութեան մէջ, սակայն դա չի նշանակում, որ միւս իշխանատոհմերը պէտք է արհեստականօրէն կցուեն Պահլաւունիներին: Ժամանակին այդպէս է եղել Կեչառիսի հիմնադիր Գրիգոր Ապիրատ Մագիստրոսի պարագայում, որին մենք անդրադարձել ենք առանձին ուսումնասիրութեամբ²⁹: Կարծում ենք, որ Անիի Բագնատունեաց թագաւորութեան պատմութեան մէջ այսուհետեւ իր տեղը պէտք է ունենայ նաեւ Բագնայրի հիմնադիր Սմբատ Մագիստրոսի տոհմը:

26 Հայերէն ձեռագրերի յիշատակարաններ. Ե-ԺԲ դդ., աշխ. Ա. Մաթեոսեանի, Եր., 1988, էջ 110
 27 Գ. Յովսէփեան, Յիշատակարանը ձեռագրաց, հտ. Ա, Անթիլիաս-Լիբանան, 1951, էջ 254:
 28 Հայերէն ձեռագրերի յիշատակարաններ. Ե-ԺԲ դդ., էջ 110

29 Կ. Մաթեոսեան, Գրիգոր Ապիրատ Մագիստրոսը եւ նրա տոհմը ԺԱ դարում, «Բանբեր Մատենադարանի», Եր., 2008, թիւ 18 (հրատարակութեան ընթացքի մէջ է):

